

**Muhyiddin Minta Rakyat Terengganu Tenang Hadapi Kemelut Politik  
Bernama  
May 13, 2014**

KUALA LUMPUR, 13 Mei (Bernama) -- Tan Sri Muhyiddin Yassin pada Selasa meminta rakyat Terengganu bertenang dan bersabar dalam menghadapi kemelut politik di negeri itu.

"Insya-Allah kita akan dapat jalan yang terbaik untuk selesaikan kemelut ini," kata timbalan perdana menteri menerusi mesej Twitturnya pada Selasa.

Muhyiddin juga ialah Timbalan Presiden Umno dan Timbalan Pengerusi Barisan Nasional (BN).

Terengganu menjadi tumpuan susulan peletakan jawatan Datuk Seri Ahmad Said sebagai Menteri Besar semalam, selain turut mengisytiharkan keluar Umno dan menjadi Anggota Dewan Undangan Negeri (Adun) Bebas bagi kerusi Kijal.

Turut mengikut jejak Ahmad ialah Ghazali Taib (Ajil) dan Roslee Daud (Bukit Besi).

Berikutan perkembangan terbaharu itu, BN kini mempunyai 14 daripada 32 kerusi DUN Terengganu, PAS (14), PKR (1) dan Bebas (3).

Berikutan peletakan jawatan Ahmad, Adun Seberang Takir Datuk Ahmad Razif Abdul Rahman dilantik sebagai Menteri Besar Terengganu yang baharu.

Beliau mengangkat sumpah jawatan di hadapan Sultan Terengganu Sultan Mizan Zainal Abidin di Istana Syarqiyyah, Kuala Terengganu, semalam.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1037968>